

DARI SEBULAN KE SEBULAN

Tuan Haji Ali, Cif Kadi rupanya telah membaca

Qalam yang menganjurkan supaya didadakan *Munāẓarah* atau

Muzakarah di antaranya dengan pengarang *Risālah al-Madhāhib* yang telah
di bidas di dalam khutbah Jumaatnya pada 19 April yang lalu.

Di antara lain, beliau mengatakan bahawa tidak pula pernah di adakan
oleh ulama-ulama Islam. Orang-orang yang mendengar khutbah
itu terperanjat, kerana lazimnya di dalam khutbah diucapkan
perkara-perkara am, tetapi sekarang rupanya ia menjadikan
khutbah Jumaat itu sebagai tempat menjawab kritik yang
dihadapkan kepadanya – ertinya untuk sahsiahnya sendiri.

Langkah yang seperti ini, ditambah pula dengan pengakuannya
tidak pernah diadakan Muzakarah oleh ulama-ulama Islam,
dipandang oleh mereka itu bahawa boleh jadi Tuan Haji
Ali berpendapat apa yang dikatakannya sahaja itulah yang benar
dan mencari kebenaran itu dengan bermuzakarah atau
bermunazarah tidak perlu. Orang hairan mendengar pandangan
itu kerana berapa banyak daripada ayat-ayat al-Qurān dan al-Hadīth
yang menganjurkan supaya dicari kebenaran di dalam sesuatu
perkara yang bertelingkah.

Mudah-mudahan Tuan Haji Ali tidak gelap mata

lagi dengan hal yang demikian ini supaya hal-hal yang mengenai
dirinya jangan dijadikannya risalah berkhutbah Jumaat dan
kalau betul ia seorang ulama semolek-moleknnya menerima
tawaran mencari kebenaran itu jangan hanya menepuk
tabuh masjid, di khutbah Jumaat sahaja di hadapan ramai,
tetapi berhujah untuk menegakkan kebenaran tidak berani.
Inilah barangkali cara-cara yang dihajat oleh Tuan Haji
Ali yang berpendapat hukum-hukum agama itu hanya haknya

sebagai seorang “ulama” daripada Majlis Islam

penasihat kerajaan yang hanya mempunyai tanggungjawab
di dalam perkara-perkara agama dan tidak boleh boleh dibantah dan
dirunding-rundingkan lagi.

* * *

Ungku Aziz, Ketua Dewan Bahasa, menurut siaran

akhbar akan meletakkan jawatannya berbetulan pada Hari Raya

ini. Sebab-sebab perletakan jawatannya itu ketika menulis

ini belum disiarkan, tetapi harus beliau terasa bahawa

tanggungjawab untuk laksanakan cita-cita Dewan Bahasa

itu mendapat sekatan tentang kewangannya. Kerana dalam

belanjawan pada tahun 1956 Dewan Bahasa dan Pustaka

mendapat \$1,00.014 tetapi bagi tahun 1957 hanya

\$237,800. Melihat kepada perbandingan yang begini besar maka
sudah tentu tidak ada ertinya seruan atau akuan

Kerajaan Persekutuan untuk menjadikan Bahasa Melayu

bahasa rasmi di Tanah Melayu ini jika tidak ada perbelanjaan

yang diuntukkan bagi melaksanakan tujuan-tujuan itu. Sebab

itulah harus pendapat-pendapat yang pernah disiarkan di dalam

majalah ini, melihat kepada langkah-langkah Kerajaan Persekutuan,

Dewan Bahasa dan Pustaka itu hanya sebagai suatu

topeng di dalam suatu cita-cita untuk meruntuhkan

kemajuan Bahasa Melayu dan akan dijadikan sebab

kelak bahawa tidak cukup alat-alatnya, Bahasa Melayu kurang

mempunyai bahan-bahan percetakan yang akan membolehkannya

itu menjadi bahasa rasmi di Persekutuan Tanah Melayu

di dalam masa sepuluh tahun itu. Hal ini perlu

diperhati oleh orang-orang Melayu sendiri bagaimana

terjadi tipu muslihat untuk menghalang bahasa

Melayu umumnya.

* * *

Daripada belanjawan sebanyak \$132,185.000 untuk perkembangan pelajaran Persekutuan Tanah Melayu hanya \$700.000 yang diintukkan untuk membeli buku-buku di sekolah, untuk Maktab Tanjung Malim? Dan Maktab Perempuan sebanyak? Ini semuanya adalah menunjukkan bahawa rupanya cita-cita perkembangan Bahasa Melayu itu tidak dilaksanakan dengan sepertinya tetapi hanya ditopengkan sahaja untuk menyedapkan orang-orang Melayu bahawa bahasanya diiktiraf sebagai bahasa rasmi tetapi pelaksanaannya tidak ada. Yang “kenyang” di dalam semua perkara yang tersebut tidak lain dan tidak bukan khususnya berkenaan dengan buku-buku adalah perusahaan bangsa asing sebab buku-buku yang diutamakan untuk sekolah-sekolah itu adalah daripada buku-buku yang dicetak di London dan dibuat oleh bekas-bekas pegawai Pejabat Pelajaran dan kadang-kadang buku-bukunya tidak ada dijadikan pula bahan membuat ujian sebagai simpanan mereka.

Ketidakadilan yang demikian sepatutnya di dalam cita-cita menuju kemerdekaan ini tidak berlaku. Sepatuunya perusahaan anak Melayu digalakkan dan diberi kuota untuk mengadakan buku-buku dan diberi kerjasama oleh Pejabat Pelajaran dan memberi dasar-dasar yang hendak dibuat untuk buku-buku itu untuk digunakan di sekolah yang menggunakan bahasa Melayu. Sebaliknya patut pula perusahaan-perusahaan Melayu yang berjasa mengembangkan Bahasa Melayu sejak dari dahulu lagi diberi bantuan untuk membolehkan mereka bersaingan dengan bangsa-bangsa asing – tidak semua percetakan, penerbitan diutamakan di England, diutamakan bangsa yang bekas menjajah negeri ini supaya kaya raya sedang anak Melayu atau perusahaan Melayu tidak diendahkan dan harus

pula kalau boleh menurut pandangan sebahagian orang,

perusahaan-perusahaan itu patut diruntuhkan.

* * *

Dalam sebuah akhbar tempatan ketika menyiarkan berita tentang perjuangan di antara *Dār al-Islām* yang dipimpin oleh Kahar Muzakkar mujahid Islam yang mengadakan tentangan hebat di Sulawesi dengan tentera Indonesia itu mengatakan bahawa “kumpulan-kumpulan *Dār al-Islām* itu diketuai oleh Kahar Muzakkar, pemimpin puak pengacau nombor satu di Selibis (Sulawesi?).” Kerana akhbar itu, kita percaya orang-orang dalamnya masih mengaku beragama Islam tentunya harus berfikir dua kali apabila mengeluarkan perkataan itu jika ia orang Islam, kerana apakah hendak dikatakan kepada seorang mujahid yang bercita-cita menegakkan negara Islam itu? Orang Islam tentu mengangkat tangan kepada Kahar Muzakkar tentu tidak akan mengatakan ia sebagai seorang pengacau, tetapi adalah sebagai seorang mujahid yang mengorbankan darahnya, kesenangan dirinya untuk menunaikan seruan Tuhan supaya berdiri negara Islam.

Tetapi memangnya dunia sudah beradat selalu di dalam sesuatu cita-cita itu ada pula musuh-musuh Islam yang berselimut dengan Islam untuk menyebelahi lawan-lawan Islam dengan tulisan dan lisannya. Apakah kita akan mengatakan orang-orang yang serupa itu sebagai orang Islam atau tidak kerana kerap kali kita melihat apabila perkara-perkara yang merugikan itulah yang diutamakan. *Wa al-Hāṣil* pembaca-pembaca sendiri boleh menimbangkannya.

Dalam kongres bahasa yang ketiga dahulu, telah disetujukan untuk mencari jalan supaya ejaan di antara Indonesia dan Malaya dapat disatukan dan ejaan Indonesia yang mengikut cara Belanda dan ejaan bahasa Melayu yang mengikut cara Inggeris itu dapat

sambungannya di muka 51